

齊原縣志卷十三

藝文 歷代御製 表疏 古文 論 辨

地靈淑之氣峙而爲嶽流而爲川是蓋行乎其所
得不行止乎其所不得不止天下之文章莫大乎
是濟邑山王屋而水濟瀆孕雲毓秀蔚爲至文故歷
代祭告之文與雅頌並而特頒詔勅以示褒嘉良臣
義民亦皆邦家之慶也若夫文人學士其歌咏論著
並與山川照耀於無窮嗚呼盛矣哉志藝文

歷代御製

北魏

文帝祭濟瀆文

乾光資耀坤載播液惟瀆暢靈協輝陰辟廢象憑和
升降芳瀝蘊神包化北土宣績溫方湧瑞沅源導濟
引流通倉實侔四體作潤岱嶠含雲吐澧潤波湛湛
川風瀾瀾瞻洪津而懷德乘長波而欽智汎龍儀之
郁穆璨玉軒而浮被沉璋璧之明物冀牲潔以歸寄

宋

真宗賜陳堯叟詔

勅堯叟省所上表以赴河陽戀闕事具悉卿象緯儲
靈珪璋挺秀出符亭會入掌鴻樞正色立朝得大臣

之體精衷奉上有良弼之稱副彼民瞻居然國器而
偶嬰疾疢願罷釣衡朕重違乃誠聿隆異數仍蒞陪
京之鎮庶諧養素之心方戒塗而有期遽削牘而來
上傾輸懇切眷戀闕庭見愛君之愈深宜勿藥之非
晚覽觀之際駭歎良增故茲詔示

徽宗封濟瀆詔

宣和七年

朕惟百川莫大泗瀆禹導沅水是爲濟源漢祠滎陽
具載祀典國家登秩益嚴歲祀循用王儀所以致崇
極之意也河陽濟瀆廟清源王利澤溥博陰福吾民
屬者寇發鄰郡將犯縣境邑人奔走禱于爾大神雷

雨迅興沁河有湯池之險旌旗剡列南岸象羽林之
嚴賊徒褫魄以咸奔閭里安堵而相慶奏函來上休
應昭然嘉歎不忘宜崇美號庶答靈貺式慰民心來
格來歆一方永賴可特封清源忠護王

明

太祖改正嶽瀆神號詔

洪武二年

自有元失馭群雄鼎沸土宇分裂聲教不同朕奮起
布衣以安民爲念訓將練兵平定華夷大統以正永
維爲治之道必本於禮考諸祀典如五嶽五鎮四海
四瀆之封起自唐世崇名美稱歷代有加在朕思之

則有不然夫嶽鎮海瀆皆高山廣水自天地開闢以
至於今英靈之氣萃而爲神必皆受命於上帝幽微
莫測豈國家封號之所可加瀆禮不經莫此爲甚至
如忠臣烈士雖可加以封號亦惟當時爲宜夫禮所
以明神人止名分不可以僭差今命依古定制凡嶽
鎮海瀆並去其前代所封名號止以山水本名稱其
神郡縣城隍神號一體改正歷代忠臣烈士亦依當
時初封爲實號後世溢美之稱皆與革去其孔子善
明先王之要道法天下以濟後世非有功於一方一
時者可比所有封爵宜仍其舊庶幾神人之際名正

言順於理爲常用稱朕以禮祀神之意一四海稱東
海之神南海之神西海之神北海之神一四瀆稱東
瀆大淮之神南瀆大江之神西瀆大河之神北瀆大
濟之神

太祖告北海神文

洪武三年
遣官阮駿

皇帝制曰生同天地浩瀚之勢旣雄淺深之處莫測
古昔人君名之曰海神而祭之於敬則誠於禮則宜
自唐以及近代皆加以封號因元君失馭四方鼎沸
朕起自布衣承上天后土之佑百神之助削平暴亂
以主中國職當奉天地享鬼神以依時式古法以治

民今寰宇既清特脩祀儀因神有歷代之封號予起
寒微詳之再三畏不敢效蓋觀神之所以生與穹壤
同立于世其來不知歲月幾何凡施爲造化人莫可
知其職必受命於上天后土爲君人者何敢預焉予
懼不敢加號特以北海名其名依時祭祀神其鑒知
尚享

太祖祭濟瀆神制

洪武十年

荷上天厚土之眷命蒙神之效靈以致平羣雄息禍
亂君主黔黎于華夏統控蠻夷於今十年中國康寧
然于神之祀若以上古之君而言之則君爲民而禱

載有春祈秋報之禮於斯之祀有望於神而祭之有
狩于所在而燎瘞者今予自建國以來十年于茲國
爲新造民爲初安是不得親臨所在而祀神也特遣
開國功臣謝成道士鄭允存曾彥成以如予行奉犧
牲祝帛於祠下以報效靈自今以後歲以仲秋詣祠
惟神鑒之尚饗

成祖告北海神制

永樂五年遣
官葉時足

比者安南逆賊黎季犛及子黎蒼暹凶肆暴擾邊
疆侵奪思明府祿州等處地方予加寬貸不肯興師
問罪但遣使諭使還地黎賊巧詞支吾所還之地多

非其舊還地之後復據西平州又侵寧遠州逼脅命吏占管人民劫掠資財殺擄男女邊境之民受其殘酷安南之人並被其害誅求百端老幼不寧占城之地累年遭其劫掠予數遣人告諭冀其改過而賊稔惡日甚固有悛心予爲天下主視民塗炭安忍弗救乃命將出師聲罪致討志在弔民豈敢用兵實出于不得已賴皇天后土眷佑嶽鎮海瀆效靈將士奮忠賈勇悉掃蕩其孽黨撫安其善良尚念將士暴露于外離其父母妻子山川險阻道里迢遙今天氣炎熱恐嵐瘴鬱蒸起居失調易于感疾予夙夜念此寢食

弗寧萬冀神靈鑒予誠悃聞于上帝賜以洪庥潛消
瘴癘早降清涼使將士安寧百病不作特遣人致香
幣牲醴詣神所祭告尚享

宣宗祭北海神制

宣德十年
遣官薛廣

予新嗣祖宗大位統理下民夙夜惓惓養民爲務尚
祈神靈陰隆助相俾雨暘時順災沴不生百穀用成
民用康濟國家清泰永賴神庥謹以香幣達予至誠
惟神鑒格

英宗祭北海神制

正統
二年

朕祗御下民永懷保恤百穀長育茲惟厥時顙冀明

靈特隆敷佑無災無沴時雨時暘作歲豐穰以穀黎
庶尚享

英宗賜田義民勅

正統六年

國家施仁養民爲首爾能出穀豆一千三百二十餘
石以助賑濟朕用嘉之今特賜勅獎諭勞以羊酒旌
爲義民尚允蹈忠厚表厲鄉俗用副朝廷褒嘉之意
故勅

英宗祭北海神制

正統九年
遣官尚達

予奉天育民愧涼于德致茲久旱災及羣生夙夜省
躬中心惓切神司北海憂憫諒同雨農以時宜任其

濟水縣志 卷十三
責特茲致禱尚冀感通宏佑甘霖用致豐稔匪予之
惠時乃神庥

景帝告濟瀆神制

景泰二年

天降膏雨在風雲率其職地湧甘泉由嶽瀆效其靈
天地之澤或秘風雨嶽瀆不得辭其責也今歲雨暘
時序所以澤萬物者至矣而濟流不快所以灌百川
者歉焉河不由道而水決于海泰山泗瀆之源復秘
南北漕運之渠日涸此雖軍民之患實關天地之仁
固朕不德所召而神之責何如天地均有矜惠生民
之心神可獨無奉若天地之意務使河循古道分既

朔南復大布泉源廣慰興望神既有以塞其責朕亦有以賴于神神其鑒格專候感孚謹告

景帝禱北海神制

景泰六年
遣官馬謹

恭承大命重付眇躬民社所依災祥攸繫志恒內省
政每外乖茲者雨澤不敷河流欠浹舟船淺滯禾稼
焦萎災患由臻公私所病究惟所自良有在茲然因
咎致災固朕躬罔避而轉患爲福實神職當專大有
咎無功過將惟一而轉禍爲福功孰與釣特致懇祈
幸副懸望謹告

憲宗告北海神制

成化十三年
遣官張瑄

國家敬奉神明聿嚴祠祀所期默運化機庇佑民庶
乃近歲以來或天時不順地道欠寧或雷電失常雨
暘爽候或妖孽間作疫癘交行遠近人民頻遭饑饉
流離困苦痛何可言惕然于衷固知攸措惟神奠鎮
一方民所恃賴覩茲災沴能不究心是用特具香幣
遣官祭告尚冀體上帝好生之德鑒予憂憫元元之
意幹旋造化宏闡威靈捍患禦災變禍爲福庶幾民
生獲遂享報無窮神其鑒之謹告

孝宗告北海濟瀆神制

宏治四年
遣官李璋

伏自去歲一冬無雪今春天時亢旱雨澤愆期田苗

枯槁黎庶憂惶予甚兢惕用時側身修省虔致禱祈
惟神矜憫下民斡旋大造早霈甘澤潤滋禾稼宏濟
民艱庶民有豐稔之休則神亦享無窮之報謹告

武宗告北海濟瀆神制

正德六年
遣官胡拱

去年以來寧夏作孽命官致討逆黨就擒內變肅清
中外底定匪承洪佑何克臻茲因循至今未申告謝
屬者四方多事水旱相仍餓莩在塗人民困苦盜賊
嘯聚勦捕未平循省咎由實深兢惕伏望神慈昭鑒
幽贊化機災沴潛消休祥協應佑我家國永庇生民

謹告

世宗告濟瀆神制

嘉靖三十三年
遣官鄒守愚

朕奉天命子育萬民所冀歲稔時和災害不作邇者
各處地方水旱兵荒人民遭阨危凶載路災變異常
朕心憂惕惟神上奉帝命奠濟一方諒垂矜憫爰命
潔士齋捧香帛特遣撫臣備儀竭虔詣祠致祭所冀
明神大彰靈應潛幹化機俾氣序順調雨暘時若弭
解災劫溥資豐泰庶同朕奉天子民之意而神亦享
祀于無窮矣謹告

前明屢朝遣祭尚多而各宗嗣位亦必祭告以其
文事相同茲不具錄

表疏

魏

請修枋口表

司馬孚

臣孚言臣被明詔興枋口水利臣既到檢行沁水源
出銅鞮山屈曲周廻水道九百自太行以西王屋以
東層巖高峻天時霪雨衆谷走水小石漂逆木門朽
敗稻曰汎濫歲功不成臣輒按行去堰五里以外方
石可得數萬餘枚臣以爲方石爲門若天亢旱增堰
進水若天霖雨波澤充溢則閉枋斷水空渠衍漑足
以成河雲雨由人經國之謀暫勞永逸聖王所許願